

## Em Wunderland

---

1.

Wo i ogfähr sechs Johr alt gwä bin  
Do hat me mei Muadr zum aikaufa gschickt  
D'Milchkann dabei. Geld im Hosesack drin  
Gosch ins Milchhäusle bringsch mr 2 Lidder mit

2.

Mein Kumpl Franz war mit dabei  
Übr d staubige Siedlungsstroß semmer zum Lada nogrennt  
Und händ schlenkert mit onsre Kanna, mir zwei  
Luschtig häämers geht, weil mir hän uns ja au ganz gut kennt

**Refr.**

Des kammer sich heit kaum no vorstella  
Daß mr dKender alloi zum Eikaufa schickt  
Und dabei ischs neiganga in a Wonderland  
Do hats geschmeckt, da hats Sacha ghet, des war fei verrückt  
Ond d'Kender kennet nemme den Gschmack  
Weil d'Milch gibt's doch bloß no im Tetra Pack

3.

Dr Franz net faul, mir ganget hoim  
Do Nimmt r d'Milchkann fescht mit boida Händ  
Du i zoig dr was, des isch fei geheim!  
Mi wondert nix, i woiß ja daß der a bißle spennt

4.

Und scho kroist die Milchkann ganz gschwend  
Dem lustige Siach wie s Riasarad um boide Ohra  
Do hat er die Zentrifugalkraft scho kennt  
Und koin einziger Tropfa goht verlora

**Refr.**

Des kann sich heit koiner meh vorstella  
Wie des war mit de Freind, mit denne hat mr alles gmacht  
Und beim Blick zrück hämmer gläbt wie im Wunderland  
Do wars spannend und gfährlich ond mr halt au viel glacht  
Ond d'Kender kennet heit nemme den Spaß  
Den mir ghet hän beim Spiela auf der Gaß.